

• Можга ёрос литературалэн арзлы

Светлана ВОРДАКОВА, туспуктйз Мария МАМОНТОВА

# Сибы гуртэ вордйз монэ

Йёскалык библиотекаысь «Удмурт шаер» клубын Бадзым Сибы гуртын вордйськем писательёслы сйзем жыт ортчиз. Со Можга ёрос литературалэсь арзэ пусьён улсын радъяськиз. Бадзым Сибыын вордскемын гожьяськисьёс Игнатий но Василий Гавриловъёс, Михаил Покчи-Петров, Анатолий Петров, Анатолий Григорьев; экономика тодосъя доктор Михаил Шишкин, кылосбур тодосъя доктор Александр Шутов, кылосбур тодосъя кандидат Лидия Долганова но мукетьёсыз.

Ужрадын «гуртлэн феноменэз» сярись вераськон ортчиз. Данъяськымон адымиоссы но «Святой источник» турмаршрутсы сярись мадиз Сибыысь культура юртэн кивалтйсь Елена Сергеева. Солэн верамезъя, гуртазы, гожьяськисьёс, дышетйсьёс, тодосчиос сяна, спортъя 10 мастеръёс но 13 мастере кандидатъёс будэмын. Соос ас уженызы, быгатонлыкеннызы быдэс Удмуртилы жутскыны юртто.

Михаил Покчи-Петров, Игнатий но Василий Гавриловъёс сярись трос тун-

сыкозэ вераз Удмурт Элькунысь культура удысысь дано ужась Анна Евсеева. Гавриловъёслэн чужанайзы Псковской губерниысь вылэм, вынзы Михаил Оренбург областъысь Бузулук карын улэм. Кемалась өвёл Сибыын улйсьёс солэсь суредъёссэ шедьтйзы.

Удмурт театрысь валтйсь драматург, Правительство лэн литературая премиез лэн лауреатэз Анатолий Григорьев пусйиз:

– Мыным шуд усиз Бадзым Сибыын вордйськыны. Гуртлэн феноменэз сярись ке верано, мынам малпамея, Сибы люконтэм герзаськемын Вера Васильевна Толстая лэн нимыныз. Вашкала дворян выжыысь потэм зуч нылкышно, Лев Толстой лэн чыжы-выжыез, гуртысь пинальёсты 25 ар чоже дышетйз. Удмурт кылын вераськыны дышетскиз. Сибыос али но тау каро тодонвалан сётэмез понна. Гуртысь музей нуллэ солэсь нимзэ.

Удмурт Элькунысь дано артистка Оксана Гаврилова но мылкыдзэ усътйз. Солэн пересь песянаез Гаврилов агай-выньёслэн суэрзы вылэм. «Зеч-а, бур-а, удмурт



**Пинальёс данъясько гуртысьтызы потэм тодмо гожьяськисьёсын но тодосчиосын.**

кыл!» учебникъёслэн авторзы Надежда Боталова но вордскем гуртэныз данъяськемез сярись вераз, учебникъёсы И. Гаврилов лэн, М. Покчи-Петров лэн, А. Григорьев лэн ужъёсы пыризы шуыса пусйиз.

Ужрадлы задор но шунит мылкыд пычатйзы Сибы пальёсысь кырзанъёс. Соосты быдэстйз «Марзан» фольклор ансамбль (кивалтйсьез Алексей Спиридонов).